

18/08/1999

Insan patriotik tidak menyerah

Abdullah A M

TIADA perkataan yang harus saya luahkan apabila melihat siaran langsung mengenai kepulangan Datuk Azhar Mansor, pada malam 11 Ogos 1999 (kira-kira jam 11.39 malam). Beliau kelihatan letih, tetapi memperlihatkan kecekalan jiwa, tabah, tinggi semangat juang dan berdedikasi, disambut dengan penuh meriah dan gemilang oleh Perdana Menteri, Datuk Seri Dr Mahathir Mohamad dan rakyat di perkarangan Hotel Awana Porto Malai, Pulau Legenda Langkawi.

Syabas! sekali lagi kepada wira negara yang dianggap orang pertama mengelilingi dunia secara solo di laluan baru. Kita antara rakyat Malaysia yang bangga dan paling gembira, apabila seorang rakyat Malaysia melakukan satu catatan bersejarah dan unggul. Tahniah! untuk Azhar dan pengorbanan beliau wajar dikenang seluruh rakyat, sebagai wira negara.

Umum ketahui, sebelum ini, negara melahirkan wira negara yang mengharumkan negara di peringkat antarabangsa apabila dua rakyat Malaysia berjaya menawan Gunung Everest di samping sekumpulan lagi menawan Kutub Utara.

Demikianlah rentetan demi rentetan yang wajar dibanggakan oleh rakyat dan negara. Merekalah insan-insan pencipta sejarah dan bakal dikenang sepanjang masa. Apakah akan lahir wira baru demi mengharumkan negara di persada antarabangsa. Insan yang berjiwa patriotik tidak mudah menyerah.

Dapat kita renung betapa Azhar berjaya mengeliling dunia secara solo dengan jarak 25,000 batu nautika, mengambil masa 190 hari. Itulah semangat keberanian, ketabahan dan kecekalan yang ditunjukkan oleh anak muda Malaysia yang tidak ternilai. Beliau sanggup meredah dan mengharung gelombang yang bukan kecil tetapi bertarung dengan maut dan bencana. Maklumlah, laut memiliki seribu kemungkinan. Sudah banyak kapal pelaut dan pelayar di zaman silam yang diragut ombak yang mengganas.

Legenda Panglima Awang yang ditulis dalam novel Panglima Awang oleh pengarang terkenal Harun Aminurrashid menyajikan kecekalan anak Melayu sebagai pelayar yang berwibawa. Kemungkinan besar, semangat Panglima Awang mengalir dalam darah dan nadi Azhar, sehingga beliau tidak mudah mengaku kalah, walaupun merentasi laut yang dicurigai wujudnya gunung bawah laut dengan gelombang laut yang begitu mencabar. Pelbagai halangan terpaksa ditempuhi dan paling mencabar dan boleh mematikan niat sucinya ialah apabila tiang layar Jalur Gemilang patah tiga, kira-kira 900 batu nautika dari Pulau Falkland. Demi meneruskan misinya, Kumpulan Gapada Sdn Bhd menghantar tiang layar melalui Hercules C-130 ke Pulau Falkland.

Dengan merentasi tiga lautan luas dan melepasi lima tanjung paling selatan, sudah cukup menggambarkan keberanian dan kecekalan semangat Azhar yang tegar, dan berhati waja.

Negara kita, masih mengharap wira yang berani tampil ke depan demi menjulang nama di arena antarabangsa. Baik dalam bidang sukan, pendidikan, politik, ekonomi, sosial dan lain-lain; kita sebenarnya memerlukan wira-wira. Mereka sanggup mengharumkan nama negara dengan ikhlas tanpa mengharap balasan. Semua perjuangan adalah mencapai 'mardhatillah' (keredaaan Allah) dan kejayaan itu sewajarnya dikongsi bersama oleh semua warga di bumi berdaulat ini. Syabas! Azhar, saya kenang dikau dalam tulisan ini dan serangkap pantun di bawah:

Banyak cakrawala di angkasa lepas,
Bintang kejora menyentuh rasa,
Cekal semangat juangmu tak terbatas;
Mengharumkan negara di persada antarabangsa.

